

**PROTOKOL**  
**OD PRIJAVE TEME DO ODBRANE DOKTORSKE DISERTACIJE**  
**NA PRIRODNO-MATEMATIČKOM FAKULTETU UNIVERZITETA U SARAJEVU**

sačinjen na osnovu

Pravila studiranja za treći ciklus studija na Univerzitetu u Sarajevu – doktorski studij –  
sa primjenom na kandidate upisane počevši od studijske 2018/2019. godine

**PRIJAVA, OCJENA I ODOBRAVANJE TEME DOKTORSKOG ISTRAŽIVANJA**

(Odabir teme)

Doktorant u toku II semestra studija bira oblast istraživačke teme i zajedno sa supervizorom definiira užu oblast i temu doktorske disertacije. Kandidat popunjava Obrazac broj 1 za prijavu teme doktorske disertacije, i dostavlja ga putem Protokola Fakulteta vijeću doktorskog studija odsjeka. Temu doktorske disertacije potvrđuje vijeće doktorskog studija odsjeka.

(Sadržaj prijave projekta)

Početakom III semestra studija doktorant prijavljuje projekat doktorske disertacije. Prijava projekta doktorske disertacije vrši se na Obrascu broj 2, koji se putem Protokola Fakulteta dostavlja vijeću doktorskog studija odsjeka.

(Imenovanje komisije za ocjenu i odbranu projekta, radne verzije i doktorske disertacije)

Do kraja prve polovine III semestra studija vijeće doktorskog studija odsjeka predlaže Vijeću Fakulteta Komisiju za ocjenu i odbranu projekta, radne verzije i doktorske disertacije. Komisija ima tri ili pet članova. Komisija ima pet članova kada se radi o komisiji koja ima dva mentora iz razloga propisanih u članu 20. stav 4. Pravila studiranja za III ciklus studija. Komisija ima obavezno i jednog zamjenskog člana. Jedan od članova Komisije se predlaže za mentora. Svi članovi Komisije biraju se iz reda nastavnika koji imaju naučni stepen doktora nauka od kojih je većina iz naučne oblasti iz koje se prijavljuje tema.

Vijeće Fakulteta predlaže Senatu Univerziteta sastav **Komisije za ocjenu i odbranu projekta, radne verzije i doktorske disertacije** (u daljem tekstu: Komisija). Senat Univerziteta imenuje Komisiju. Komisija provodi kompletan postupak ocjene i odbrane projekta doktorske disertacije, radne verzije doktorske disertacije i konačne verzije doktorske disertacije.

(Projekat doktorske disertacije i izvještaj o podobnosti teme i kandidata)

Doktorant je dužan u toku IV semestra da pristupi odbrani projekta doktorske disertacije. Odbrana projekta se dogovara i organizuje u saradnji sa sekretarom dokorskog studija na odsjeku. Odbrana projekta doktorske disertacije je javna i brani se pred Komisijom.

Komisija sačinjava **izvještaj o projektu doktorske disertacije**, u kojem obavezno navodi i ocjenu podobnosti kandidata i teme dokorskog rada u formi Obrasca broj 6, i dostavlja ga putem Protokola Fakulteta vijeću dokorskog studija odsjeka.

Vijeće dokorskog studija odsjeka, uz odgovarajuću odluku, dostavlja Izvještaj Vijeću Fakulteta, a Sekretarijat Fakulteta prosljeđuje svu dokumentaciju Senatu Univerziteta.

Nakon što Senat Univerziteta donese odluku o prihvatanju izvještaja Komisije, doktorant može početi realizaciju projekta doktorske disertacije.

(Obaveze mentora i kandidata)

Mentor i doktorant su u skladu sa članom 20. stav 7. i članom 28. stav 1. Pravila studiranja za treći ciklus studija na Univerzitetu u Sarajevu, dužni jedanput godišnje podnijeti izvještaj o radu doktoranta odnosno izvještaj o svome radu, i to Vijeću dokorskog studija odsjeka na Obrascu broj 4 odnosno Obrascu broj 5, putem Protokola Fakulteta.

## **RADNA VERZIJA DOKTORSKE DISERTACIJE**

(Prijava i ocjena radne verzije doktorske disertacije)

Doktorant ima obavezu da pribavi pozitivno mišljenje mentora i prijavi radnu verziju doktorske disertacije vijeću dokorskog studija odsjeka do kraja VI semestra. Prijava radne verzije doktorske disertacije vrši se na Obrascu broj 7, uz koji se dostavlja i spiralno uvezana radna verzija doktorske disertacije u dovoljnom broju primjeraka za članove Komisije na Protokol Fakulteta.

(Prezentacija radne verzije doktorske disertacije)

Sekretar vijeća dokorskog studija odsjeka u dogovoru sa doktorantom i predsjednikom Komisije je dužan u periodu od mjesec dana od dostave radne verzije doktorske disertacije, zakazati prezentaciju radne verzije doktorske disertacije.

Obavještenje o prezentaciji dostavlja se Sekretarijatu Fakulteta i objavljuje se sedam dana prije održavanja prezentacije, na oglasnoj ploči i web-stranici Fakulteta i na web-stranici Univerziteta.

(Tok prezentacije radne verzije doktorske disertacije)

Postupak prezentacije radne verzije doktorske disertacije obavlja se pred Komisijom, uz prisustvo sekretara vijeća dokorskog studija odsjeka, zapisničara, doktoranta, kao i nastavnika iz oblasti iz koje se brani doktorat kao i drugih zainteresiranih lica, bez mogućnosti da postavljaju pitanja ili prekidaju doktoranta.

Primjedbe članova Komisije doktorant je dužan ugraditi u **korigiranu radnu verziju doktorske disertacije** i dostaviti je u printanom i elektronskom obliku u roku od 90 dana od dana kada je

obavljena prezentacija. Zapisnik o izvedenom postupku dostavlja se putem Protokola Fakulteta vijeću doktorskog studija odsjeka, a na Obrascu broj 8.

(Provjera doktorske disertacije)

Svaka doktorska disertacija u statusu korigirane radne verzije podliježe obavezi provjere korištenjem softvera za detekciju potencijalnog plagijarizma. Kandidat je dužan korigovanu radnu verziju doktorske disertacije dostaviti u Sekretarijat Fakulteta u PDF formatu, kako bi se ista prosljedila na provjeru. Rezultate provjere doktorske disertacije korištenjem softvera za detekciju potencijalnog plagijarizma Sekretarijat Fakulteta dostavlja predsjedniku Komisije.

(Izveštaj o ocjeni doktorske disertacije)

Nakon provedenog postupka prezentacije radne verzije doktorske disertacije i dostavljanja korigirane radne verzije doktorske disertacije, i rezultata provjere doktorske disertacije (koji su sastavni dio Izveštaja) Komisija Univerziteta sačinjava **Izveštaj o ocjeni doktorske disertacije** koji sadrži ocjenu prezentacije rezultata rada prikazanih u doktorskoj disertaciji.

Komisija ima rok od 30 dana da dostavi Izveštaj vijeću doktorskog studija odsjeka zajedno sa korigiranom radnom verzijom doktorske disertacije. Izveštaj se podnosi na Obrascu broj 9 i dostavlja se putem protokola Fakulteta.

Vijeće doktorskog studija odsjeka u roku od deset dana donosi odluku o prihvatanju izvještaja Komisije i dostavlja ga putem Protokola Vijeću Fakulteta.

(Uvid u izvještaj i korigiranu radnu verziju doktorske disertacije)

Po prijemu odluke vijeća doktorskog studija odsjeka o prihvatanju izvještaja Komisije, Sekretarijat Fakulteta objavljuje na oglasnoj ploči, web-stranici Fakulteta i u medijima da se izvještaj Komisije i korigirana radna verzija doktorske disertacije stavljaju na uvid javnosti. Korigirana radna verzija doktorske disertacije i Izveštaj o ocjeni doktorske disertacije ostaju na uvidu javnosti 30 dana.

(Dostavljanje izvještaja o ocjeni doktorske disertacije Senatu Univerziteta)

Po isteku roka od 30 dana Vijeće Fakulteta na prvoj narednoj sjednici razmatra Izveštaj Komisije i dostavljene eventualne primjedbe od javnosti i predlaže Senatu Univerziteta da se prijedlog doktorske disertacije prihvati, odbije ili vrati na dopunu odnosno izmjenu. Senat Univerziteta verificira izvještaj i prijedlog Vijeća Fakulteta.

U slučaju da Vijeće Fakulteta prihvati radnu verziju doktorske disertacije, doktorant je dužan da u roku od 60 dana od prijema odluke Vijeća Fakulteta pripremi finalnu verziju doktorske disertacije, i dostavi je u potrebnom broju primjeraka.

Doktorant je dužan dostaviti Voditelju doktorskog studija odsjeka najmanje jedan rad objavljen u časopisima koje prate relevantne međunarodne baze iz registra relevantnih naučnih baza podataka ili potvrdu da je rad prihvaćen.

Voditelj izdaje potvrdu da kandidat ima objavljen rad, koju kandidat prilaže uz finalnu verziju doktorata na Protokolu Fakulteta. Doktorska disertacija se predaje u deset primjeraka u tvrdom uvezu i pet primjeraka elektronskih verzija na odgovarajućim medijima.

## ODBRANA DOKTORSKE DISERTACIJE

(Odluka Senata o javnoj odbrani doktorske disertacije i Obavještenje o javnoj odbrani)

Uz prihvatanje izvještaja Komisije o korigiranoj radnoj verziji Senat Univerziteta donosi i odluku o javnoj odbrani doktorske disertacije pred Komisijom. U slučaju spriječenosti nekog od članova komisije, uključuje se rezervni član.

Sekretarijat Fakulteta će u dogovoru sa sekretarom doktorskog studija odsjeka utvrditi mjesto, datum i sat odbrane doktorske disertacije. Sekretarijat Fakulteta obavještava javnost najkasnije sedam dana prije termina zakazane odbrane o javnoj odbrani doktorske disertacije informacijom na oglasnoj ploči i web stranici Fakulteta, web-stranici Univerziteta i saopćenjem u medijima

Javna odbrana doktorske disertacije organizira se najkasnije 30 dana od dana odluke Senata Univerziteta.

(Tok javne odbrane doktorske disertacije)

Javna odbrana doktorske disertacije održava se pred Komisijom.

O toku javne odbrane doktorske disertacije vodi se zapisnik koji potpisuju članovi Komisije i zapisničar, na Obrascu br. 10, koji se putem Protkola Fakulteta uz Izvještaj o toku i rezultatu odbrane doktorske disertacije dostavlja Vijeću Fakulteta na njegovo konačno usvajanje. Odluku Vijeća Fakulteta sa izvještajem Komisije Univerziteta i drugom dokumentacijom o odbranjenoj doktorskoj disertaciji, Sekretarijat Fakulteta dostavlja Rektor Univerziteta radi promocije doktoranta.

### **Napomene:**

- Pravilima studiranja za treći ciklus studija na Univerzitetu u Sarajevu uređuju se: detaljna organizacija, trajanje i izvođenje studija na Univerzitetu u Sarajevu (u daljnjem tekstu: Univerzitet), nositelji studija, uvjeti za upis na studije, način izvođenja nastave i istraživanja, postupak prijave, ocjene i odbrane doktorske disertacije, prava i obaveze doktoranta, sastav komisije za ocjenu i odbranu projekta, radne verzije i konačne verzije doktorske disertacije, prava i obaveze mentora, kao i druga pitanja u vezi sa organizacijom i izvođenjem studija.
- **Ovaj Protokol je interni dokument Fakulteta i isključivo služi za lakše administrativno praćenje standardnih procedura, te ne mijenja primjenu Pravila studiranja.**
- Pravila studiranja za treći ciklus studija na Univerzitetu u Sarajevu (decembar 2018. godine) kao i svi obrasci navedeni u Protokolu mogu se preuzeti na web stranici Univerziteta u Sarajevu: <https://www.unsa.ba/o-univerzitetu/propisi/pravila-studiranja-za-treci-ciklus-studija-na-univerzitetu-u-sarajevu-0>
- Za doktorante zajedničkog doktorskog studija „**Prirodne i matematičke nauke u obrazovanju**“ primjenjuju se dodatni koraci u procedurama. Prijedloge komisija, izvještaje i slično za kandidate zajedničkog doktorskog studija razmatrat i usvajat će: Vijeće doktorskog studija odsjeka, zatim Vijeće zajedničkog doktorskog studija, Vijeće doktorskog studija Fakulteta i u konačnici Vijeće Fakulteta.

---

**Protokol je odobren od strane Vijeća doktorskog studija Prirodno-matematičkog fakulteta Univerziteta u Sarajevu, na sjednici održanoj 29.06.2020. godine.**

---